

dr Pfannehouer, Bärner Fasnacht 2018

Was macht e Muurer mit zviil Pfludi ? / Är gitt hie und hie und da es "Gudi", /
füllt Löcher, gliicht Schwachschelle n uus - usser er schafft im Bundeshuus
*Ueli dr Muurer, dä muuret bim Gäld / Ueli dr Schtrücher, dä bhauptet, es fählt /
Ueli dr volksnah wott bim Volk öppis riisse / Ueli dr Bundesrat tuet s ehnder bschisse /
D Frag isch, wi ärscht dass me das no muess näh: Es Cabaret Rotschtift, das hett s scho mal ggäh*

*

Dü-da-do, ds Gält isch cho. / Wär Gwinn verlangt z realisiere, wird (poscht)automatisch Knatsch riskiere, /
"Papi, was heisst 'Umbu-chun-gen reali-sieren' ? " / "Dasch es angers Wort für 'komPOSTieren' " /
Dü-do-da, hingedra, wartet Flixbus scho mit alle, wo wei öV-Uftreg chralle, /
d Gieze-Tanner hätte Fröid, we ohni d Poscht d Poscht abgeit !
Dü-da-doff, gitt s no meh Zoff / gitt s chli Rueh, oder isch d Ru-off ?

*

Si wei no meh Waffe exportiere, d Ozonschicht no meh ruiniere /
Wäg' dere kriminelle Wälle bruucht dr Kanton Bärn meh Gfängniszälle

*

P26-Akte tuet me schiints vermisse / die, wo dr Schtaat denn wei gschützt ha, hei ne jitze bschisse /
e Widerschpruch, so tüechti's eim / "Eh, das verschteisch Du nid, da'sch äbe gheim"

*

Die Fläschli, wo me ds Bisi driimacht / *Doping drii, Doping draa* / si fältschigssicher, Tag und Nacht !
Doping drinn, traraa ! / Die Fläsche, wo dä Brunz verzelle / chasch nid emal i ds Gfrierfach schtelle

*

Eis Jahr Schtapi Alec - was gitts da z verzelle ? Nüüt, wo chönnt es ganzes Jahr "erhelle" /
Im Shtadtrat schtout s, wüll d Rede-Zitt äng isch - u dä schnuret no lenger, als d Velobrugg läng isch !

*

Optimischte, die säge: Yeah, YB isch Schpitze ! / Pessimischte, die säge: Ja, ömu bis itze /
Öb bis itze, öb Schpitze, de Pfader isch's wohl: Pfadi Hütter als Trainer, und es Wölflü im Goal

*

Schtürm chasch itz erschteigere / "Burgliind" chasch nid verweigere /
Wär schpändet ? Ig möcht eine choufe / und i würd' ne "Blocher" toufe !

*

We Facebook meh e Fakebox isch / we dr Zuckerberg versalze n isch: /
Was isch de wahr, was isch es nid ? U wär twitteret dr Ungerschiid ?

*

Dr Tesla-Chef schiint rächt am Ars / Är schiesst si Chlapf scho ufe Mars

*

"Du mir geben, ich Dir nehmen", "Wenn Du arm, wir uns nicht schämen." /
So tönt ir "Einfachsprach"-Variante d Wältwirtschaft im Dütschkurs für Migrante

*

Salat isch gsund, ou im Schpital, z Zwösimme, ar Insle und überall. /
Pass uf, süsch isch er plötzlech wägg, wüll zmittsdinne hockt e Schnägg

*

Aber itz doch no e klassische Pfannehouer-Bank, mit juppeidi und Motto: NachFuchs
Im Rathuus isch e Fuchs entwiche / dä isch sicher nid zu de Hühener gschliche
Weiss gar nid: hett ne n öpper gseh ? / Miech o nüüt, mi gsäch ne niene meh
Was chunnt ächt - ke Prognose wag' i - als nächschti Fuchsschwanz-Närvesagi ?

*

We d Frou Egger wott e Schtoumuur oder en Outobahn toufe /
oder es Tram, de muesch gliich ke Schämpis choufe
E Fläsche Bier, das tuet s ou da / bir Frou Egger scho am Name nah
U sötts am vierte März nid grate, passt Bier o besser zum Servalabräte.
De wär ds Land, wo d Shtadt ushüdelet, nümme hingenachegfüdelet

*

*dr Blocher zu 100 Jahr Landesschtreik: "S Soziali? Isch doch alles fake /
d Armee und ds Volch und gueti Chrachte tüend d Bolschewische usemische!"
Driissg Jahr Chrapf hett s bbruucht genau / Vom Generalschtreik bis zur AHV /
bis zum Froueschtimmrächt no chli lenger / isch halt geischtig ou e chli schtrenger. /
Ja, d Schwiz bruucht lang zum Düregseh - dr Blocher no paar Jährli meh*

*

*Und dadmit wi jedes Jahr zu üsere Rubrik "Bildbetrachtung".
Ou dr Bundesrat isch hip / ds nöie Gruppebild als Comic Strip
Das heisst: Dr Hindergrund isch animiert / vore wird i d Linse gschiert
Also: Ehnder Schtilschand wie zuvor / u trotzdem hout's mittem Humor
Dank Schneider-Ammann isch das z mache: Je ärschter, descho meh zum Lache
Bim Cassis sim Sirup gseh n i's zimlech flach: We die Cartonwürfle rünne, gitte e chläbrigi Sach*

*

*Wottsch meh Waffe exportiere, dass d Schwizer Arbeitsplätz floriere
tuet das im andre Land meh Toti und meh Flüchtling' generiere
Schtatt mit Pilatus Porter nöime no meh Flüchtling' z generiere
chasch dä Kreislauf glatt dürbräche und ir Schwiz chli bombardiere
Das gitt Püetz ufem Bou, da'sch sicher nid lätz - und je meh Toti, bruucht s weniger Arbeitsplätz*

*

*Also dank dem Typ ir Air Force One weiss ig itz äntlech, was WEF bedütet: World EGOmic Forum
I ha lang no ttänkt: nei, dä chunnt nitt, mit oder ohni Budget-Schritt.
Hett dem dr Geheimdiensch das nid gseit ? Dr Golfplatz isch total verschneit !
Är hett no twitteret: "great mistake !! Die Basler Mumie isch e fake, /
z letscht bin i verwandt mit de n Indianer, oder schlimmer: Mexikaner !"
Schtell Dir vor: dr Maurer wär ke Schliimer, u d Martullo-Blocher wär e "Dreamer" ...*

*

*We mi Swisscom-Aaschluss wider mal tot isch juhuppeidi, juhuppeida /
gah n ig i d Hängematte, was ganz kommod isch juhuppeidieida /
und teile mit mir sälber, ganz ohni Ghetz, / die gröschten Momente im beschten Netz
Bir Swisscom louft s verchehrt, o Schreck / schtatt Lektüre ds tüüre Leck*

*

*Wohnigs-Wänd us alte Jeans (Mou, das gitt s, isch kei Witz !), / das löst ds recycling problem - schiints,
(und schtört nid e Bitz) / Itz weisch, warum dass si die Fätze / scho zum Trage tüe verschnätze*

*

*Im Agentur-Poscht-Lädeli poschte n'ig es Zahnputz-Fädeli, / es Päckli Pommtschipps, es Mödeli Anke, /
Aktions-Teigware für zwe Franke, / no drei Zigarillos vo de schlanke. / D Frou vom Lädeli seit:
"Danke, und darf s ächt süsch no öppis si ?" / "Eh, tüet mer no n es Mütschli drii". /
"Gärn ! Macht füzäh füzg genau". / "Eh, es Füzgi hätt i n'Ech im Fau". /
Und wo si "Nämet Dühr d Märggeli ?" seit, / säg i: "Gärn, für A-Poscht, wenn Dühr heit !"*

*

No d Billag-Gebühre ganz zum Änd, / für ds Abschaffe gitte folgendi Argumänt:

*---, ---, ---
---, ---, ---*

Merci für ds Härelöse, schöni Fasnacht !

*

© dr Pfannehouer, www.gustipollak.ch

No paar Bonus-Läsi-Värsli

*"Acht-ung: Velo-Kredit, Grünen-Mitti, mir trücke di grüne Chnöpf" / "Nei, rot, du Idiot", schreie di Rote mit rote Chöpf.
Di Rote gseh rot, si Blass-Grünen nümme grünen / Blass-Grünen gseht schwarz für d Veloplän vo Rot-Grünen. /
So schtellt d Mitti di rot-grüeni Ample uf rot, am Fraktionschef geit s chli mies, /
är isch farblech überforderet, är heisst usgrächnet Wyss*

*

*Beck und Chinos hei's itz satt, alli zieh a Rand vor Schtadt.
Dert wird bbache u gluegt und i ds Brötli bbiße, und d Altschadt isch no d Filmkulisse
O Capitol, arms Capitol, ou Di schtellt me glii ab - wi toll ... /
Wär dert mal wohnt - isch s angers z mache ? - muess zimlech grösseri Brötli bache*